

Das Erste Buch

probiren ob sie Schwanger sey/ oder nicht/ so nim Honigseym/ der außgetroffen ist/ vnd an keine Sonne kommen/ vnd kalt Wasser eines so viel als das ander/ laß warm werden/ vnd nicht sieden/ das gib der vermeinten Zumpffer zu trincken/ ein guten starcken trunck/ auff den Abend wenn sie wil schlaffen gehen/ aber daß sie nicht drauff esse oder trincke/ sondern liegend vnd schlaffend bleibe/ wird sie Ruhe haben/ kein wehe/ oder reissen im Bauch/ so ist sie nicht Schwanger/ wo aber im gegentheil/ so ist sie gewiß vnd warhafftig Schwanger.

Item/ setze die Dirne auff einen Nachstuel/ vnd umblege sie ganz wol/ setze einen Hasen mit Kolen vnter sie/ vnd wirff grosse stücke rhoter Myrrhen drauff/ machs als bald zu/ verstopffe sie gar wol/ daß der Geruch der Myrrhen nicht zu ihr komme/ vnd riechen kan/ verbinde ihr auch wol Maul vnd Nasen/ laß sie sitzen/ vnd den gestanck wol in den Leib gehen/ wird das Weib den Myrrhen schmecken/ vnd die bitterkeit im Maul befinden/ so ist sie nicht Schwanger/ wird sie aber im Maul nichts schmecken/ von Myrrhen/ vnd ihr der Mundt vom Geschmackt rein bleiben/ vnd doch ein grosser Dampff vnter ihr ist/ so ist sie warhafftig Schwanger.

Das XXXVII. Capitel.

Daß ein Weib Schwanger werde.

Georgius Pictorius Villinganus der Medicin D. schreibet im 2. Capitel seines Buchs das von ihme Gyneconitis das Frauenzimmer intitulirt worden/ daß der Arzt Kyrandus für rathsam erachte/ daß ein Weib/ so Schwanger begehrt zu werden/ an ihrem blossen Arme eines siebenjährigen Kindes zahn in Goldt/ oder Silber gefast/ tragen/ vnd sich freundlich zu ihrem Ehemanne gesellen sol/ so werd sie leichtlich von ihme besamet/ vnd beschwängert.

Actius